

摘藻堂四庫全書薈要

集部

欽定四庫全書薈要

集部

李衛公別集卷六

十至

詳校官助教臣常循



欽定四庫全書薈要卷一萬四千四十九

集部

李衛公別集卷六

唐 李德裕 撰

書碑

與桂州鄭中丞書

某當先聖御極再參樞務兩度冊文及宣懿太后祔廟
制聖容贊幽州紀聖功碑討回紇制討劉稹制五度黜
戆斯書兩度用兵詔敕及先聖改名制告昊天上帝文

并奏議等勒成十五卷正觀初有顏岑二中書代宗朝
常相元和初某先太師忠公一代盛事皆所潤色小子
詞業淺近獲繼家聲武宗一朝冊命典誥軍機羽檄皆
受命撰述偶副聖情伏恐製序之時要知此意伏惟詳
悉謹狀

與姚諫議郃書三首

閏冬極寒伏惟諫議十五郎尊體動止萬福即日某悲
緒外蒙差趙押衙至奉示問不任悚荷無由拜伏倍積

瞻戀謹因使回奉狀不次閏十二月二十八日從表文
崖州司戶參軍同正李某狀上

天地窮人物情所棄無復音書平生舊知無復吊問閭
老至仁念舊盛德矜孤再降專人遠逾溟漲兼賜衣服
器物茶藥至多槁木暫榮寒灰稍暖絨感切涕咽難
勝大海之中無人拯卹資儲蕩盡家事一空百口熬然
往往絕食塊獨窮悴終日苦飢惟恨垂歿之年頻作餒
死之鬼自十月末得疾伏枕七旬屬續者數四藥物陳

衰又無醫人委命信天幸而自活羸憊至甚生意方微
自料此生無由再望旌榮臨紙涕戀不勝遠誠病後多
書不得伏惟恕察謹狀

伏蒙又賜口箴不任感戴東都日所惠本留洛中無人
檢得兼以道路艱阻二年來不曾有人至洛以此前狀
諮請倍深惶悚小生舌箴更改三五字不欲兩本流傳
今謹錄新本獻上舊本伏望封還如不能遠寄伏惟必
賜焚却下情切望趙總管知廣州時多此月下旬方至

伏惟照察謹狀

唐故左神策軍護軍中尉兼左街功德使知內
侍省事劉公神道碑

宸極正位運四時者璇樞太微啓扉分兩垣者上將其
或道兼文武勲著旂常稟嶽立之神姿蘊泉渟之深識
存也出忠入孝愛敬同歸歿也灑澤漏泉始終一貫求
之前古不亦難哉公諱弘規前京兆雲陽人也派流甚
遠珪組相承炳焯周邦光揚史牒曾祖恩官止同州白

水縣令祖信終於漢中郡折衝都尉父英皇左武衛中
郎將歷階勲至游擊將軍上柱國皆纘前緒踐履夷途
或明恕而行俾人歸厚或強毅以立顧敵必摧不顯當
時宜生達者公十有五乃應選用冲和之美暢茂於四
肢喜愠之來不塵於絕境亦由崑岫片玉嶧陽孤桐生
稟異姿終成重器始署雲騎尉賜緋累遷內侍省內僕
寺丞密侍赤墀飛聲紫禁直操不渝於規矩抗志已在
於丹霄無何丁郎將憂直臬服喪杖而後起不辭王事

是謂從權俄授徵事郎內侍省府局令屬劉闢逆命禁
旅徂征護汧隴梟騎之鋒平井絡鴟張之虜始以義擊
俄馬凱歸由是有輕車都尉之授旋又將命撫循自靈
州以屆於邊犒軍五城勤役萬里懋乃休績簡於天心
加銀印赤紱之賜充天威軍使奉詔蠻方莫安憬俗俶
儻扶義有叱馭之風感激捐軀忘跼爲之苦恩禮浹洽
要荒晏如尋自奚官局丞擢翰林院使僊署重深天顏
咫尺導才臣之啟沃廣睿哲之聰明公學富丘墳智參

神化叶機贊命發揮王猷故事藹然內庭緊賴爰加內
侍伯貳副軍中尉副左街功德之任紫艾龜印之寵以
昭其庸武旅鳬藻之師實為之佐撿校司空王公諤之
授鉞河東也改內給事為之護軍以金蘭之契睦於元
帥以泉海之量接於賓僚三軍照愛日之和列郡靡清
風之惠洎振武失守主將遁逃朝廷軫憂慮為邊患因
命尚書張煦節制是邦詔公領步騎五千為之聲援公
內運秘計外示閒安詭以巡邊掩其無備長驅猛銳深

入壘門乃以宣勞之名俾其少長皆會然後擒執魁首
寘之典刑戮三百餘人闔城股慄昔武安之坑趙卒莫
辯幽寃韓信之戰井陘徒聞疾聞未若公德刑具舉威
惠皆宣乘駟上聞班師舊鎮司徒既歿承乏總戎而高
平公奕葉相門一時盛惠與公虛舟相待朱瑟諧音淡
然而成去如始至尋又奉詔巡邊以觀軍實北至鈞注
東達飛狐道里曲折不遺於掌握兵機竒正盡在於襟
靈士懷挾纊之恩人感投醪之醉壺漿塞路幼艾爭先

爰寫山河存於繪事憲宗悅而加歎嘗置座隅得李恂
之圖書乃知聚落觀千秋之畫地盡見山川加朝議大
夫內侍省內常侍復歸舊鎮報忠勞也上以公器能可
以居重任機權可以參密勿遂發中詔俾還京師改內
飛龍使換右神策軍副使飛龍掌天驥之閑古太僕之
職也禁旅總蘭錡之兵古上卿之寄也公或為長或為
副蓋選衆而舉惟材是擇翌日命知樞密公揣摩心術
練達國章謀無不成連有餘裕當神武經緯之際王師

戡定之初一日萬幾晝嘗三接忠猷隱於聞聽嘉謀秘

於宮闈略而不書蓋溫樹不言之義也宣拜內常侍知
內侍省事旌其忠力賜名弘規弘者光大之稱規者規
範之謂合此二義表茲一心俄而淄青干紀兵集淮海
以公累護戎事尤邃武經出為淮南監軍委以攻討鳴
鐘鼓以問罪運籌策以出奇方厲志於戈矛遽纏哀於
風樹抱終身之痛自達神明當赴難之辰敢避金草起
復寧遠將軍依前充監軍使元惡既殲復掌樞密憲宗

憑几大漸召公受遺穆宗膺圖御民繫公定策捧日而
昇黃道翼龍而上赤霄名節功勳光昭圖史遷忠武將
軍內侍省少監賜上柱國進雲麾將軍服闋授銀青光
祿大夫監門衛將軍知內侍省事封彭城縣開國子累
封沛國公食邑三千戶賜以長戟列之朱門守約鳴謙
不有其貴屬幽鎮首禍趙魏挺災公內竭謀猷定指蹤
之計外緝機務當政賦之源慮不及私居嘗慎獨懸水
鏡而情無隱伏持權衡而心靡重輕巍然如山以鎮羣

動逮長慶季歲穆皇戾已彌留公志伏神明心存王室
請立先后以為副軍雪涕抗詞首陳大計舉觴瀝款衆
議皆從延年離席而社稷已安趙喜橫階而尊卑乃定
惟公方之諒無慚德公以名遂身退舉能進善人之高
躅也乃推同志固繁機遷左監門衛上將軍知省事復
為河東監軍使拜泣玉墀寵錫金帶雖魏后深恩授劉
楨之部落吳君密渥賜陸遜之金環煥赫煒榮莫逾於
此穆宗厭代先后嚮明公懇請會朝旋奉俞詔拜特進

行右武衛上將軍公以子牟之戀常懷魏闕汲黯之志
惟在漢庭懇辭北轅上不能奪尋除內宅使鴻臚禮賓
等使前代特進位次三公居驃騎儀同之上非茂勛俊
惠曷以處之遷左神策軍中尉兼左街功德使漢氏京
師有南北軍之屯武帝既平百粵內增七校今之中尉
實司其任公閱禮敦詩深知將帥之體安人和衆實有
經武之材以清淨禮縉黃以慈惠親戎旅西方之教不
肅而成北落之衛隱然難犯吐論必援於經史耽翫惟

志於圖書遇物而涇渭自分立誠而風雨如晦權雖侔
於衛霍主意益親寵雖盛於金張人心咸悅非全才曠
度豈能臻於此歟公志氣方彊春秋甚富將欲揚威瀚
海耀武龍庭展報國之壯圖恢致君之遠略勞而生疾
懇請辭榮天子憂呂蒙之未瘳委景丹之卧鎮近臣挾
醫而駢至中使賜藥以交馳心徒傾於太陽命已迫於
朝露洒血懷感啟手歸全以十一月二十八日薨於長
安東遲里第享年五十二遺表獻名馬雕鞍寶器犀帶

臣子之戀不其至乎敬宗當宁流襟廢朝三日贈開府儀同三司贈絹一千疋布四百端錢三千貫上擬三台之耀下管九泉之榮禮命所加冠於當代朝廷碩臣聞必興嘆和壘故校相視潛然昔李將軍之殂人皆流涕以其信結於士大夫公近之矣況公瞑目之後曾未經旬變起林光災纏霄極則知日殫已歿何羅之釁遂成許褚既終徐地之妖莫遏惟公峯巒聳拔挺秀色於晴霞律呂含和流清音於大厦志必存於經濟量莫挹其

冲深思若涌泉智如炙輶決勝千里通知四夷察情偽
之端達幾微之際故天子虛已以聽詢謀允諧道不取
于苟容言必歸于中正居平而博厚泛愛臨事而慷慨
立名體征虜之奉公得亞夫之守節公之掌樞也屬穆
皇寢疾逾年公之總戎也屬敬宗朝廷多事公協和將相
安靖邦家勁草不搖喬松自直傳稱公家之利知無不
為忠也送往事居俱無忤色貞也惟公有之矣惜乎未
及中壽俄歸杳冥景已戢于虞泉名空留于簡冊可不

悲哉夫人密國夫人李氏懿行蘭薰貞風玉瑩榮封石
窳寵章全德惠禮茂于宗姻洵美光于內則悲深晝哭
痛結泉扉有子五人長曰行立朝散大夫內侍省宮闈局
令上柱國彭城郡開國伯賜緋魚袋次曰行深中散大夫
內侍省給事賜紫金魚袋次曰行元闕賜綠次曰

行先朝散大夫內府局丞上柱國

闕

次曰行

闕

咸以珪璧之姿藻身文囿鴻鵠之志矯翼禁林朱紫
連華閨門雅睦忠出于孝負五龍之俊才喪過乎哀有

二連之深戚粵以太和元年十一月十四日即幽寔於
川澹之西禮也青烏啓兆悲壠樹之長陰白鶴臨風嗟
吊賓之遽返永圖丕績乃篆貞珉銘曰

皇王神化仰法星樞始自絲忽風行八區誰參其任公

寔帝俞出吐君命入讚臣謨其惟后建邦外分蕃岳粵

則淮壤雄惟朔漠誰護其軍公多智略恒瀚既寧王猷

允若其漢家宮室上應太微布列環衛恢張武威誰司

其柄公達戎機英王流眄忠賢是依其內外之寄安危

所注惟公全德乃暢機務美璧良珪瑞質凝素霜戟寶

刀森然輝庫

其四

天挺奇志貞若渾金出入三紀賢明一

心寒松在巘霜霰寧侵皇澤之厚川流比深

其五

趙孟惕

景光音遂遠長卿病瘳藥石皆晚靈芝難駐奇香莫返

光碎珠泉芳消蘭畹

其六

鹵簿詔葬城闕之東列旌旗於

素漣凝簫挽於朔風落檄檄之霜葉叫離離之晚鴻時

一往兮舟壑逝魂歸來兮松柏中

其七

唐故開府儀同三司行右領軍衛上將軍致仕

上柱國扶風馬公神道碑

夫隴坻長松必備明堂之制荆岑璞玉終為九國之寶
士或起漁釣而遭時會亦有披荆榛而贊王業求之於
古何代無賢太和六年開府儀同三司右領軍衛上將
軍致仕上柱國岐山公實封三百戶扶風馬公以侯印
罷歸至開成六年九月四日薨於永嘉里第享年六十
三詔贈揚州大都督明年二月八日以鹵簿鼓吹葬於
京兆灊陵之原馬公即國之盡忠衛主之臣也公諱存

亮字季明大父瑤皇銀青光祿大夫考操皇朝議郎房
州長史公之先族趙奢嘗以百萬勁兵號為馬服制秦
吞魏因而氏焉厥後文武派分英華不絕武則伸威百
蠻鑄銅而表海文則研道六經施帳而授業公繼前業
蔚為茂器終始一貫貞明六朝德宗時弱冠筮仕風儀
夙成帝欲分綺季之勞翼皇儲之重於是暫離武帳出
侍龍樓贊蘭英結佩之馨規桐葉剪圭之戲此則史冊
之保護也帝欲秩出納之司糾梯航之貢於是副弘羊

而實天庫佐安國而裨水衡此又孔僅之方略也帝欲
具飾車旂宣明衣服公於是典其寮案重立規模疊烟
霞以散王侯卷虹蜺而給妃后卿鬻施彰於五輅日華
搖裔於九旂此又叔孫通之文物也帝欲順時巡以察
風俗先品實以奉園陵公於是廣靈囿以樹農功采類
宮以列珍饌法后稷播殖之道遏嗇夫捷給之詞此又
卜式之理上林也帝欲昆夷即序士馬無譁公於是秩
視玉鈴榮加金鈕以奇謀而協上將以忠懇而暢皇猷

尺籍五符之勤訓馬簡士之要雖程功於衛霍終歸美
於程李此又許歷之副趙奢也元和十三年公自神策
軍副使詔授雲麾將軍左監門衛將軍知內侍省事兼
左街功德使公於是金湯天壘雷電皇威斥游惰於五
營取材能於七萃備爪牙則數逾十萬竭心膂則酬必
九遷貔貅虎豹之師鵠鶴魚麗之訓文茵貝冑之盛羽
葆靈旂之飾奉元會則雪霜委積于殿廷侍郊丘則錦繡
施張於原野公珪璋挺器禮樂資身輦下無睚眦之徒

轅門多溫恭之士知呂蒙於行陣重卻穀於詩書晉代

名卿咸受趙襄之舉漢朝武略多由去病之門此又方

召之佐宣王也敬宗時宮掖無虞蜂蠆暴起塵驚王座

熊罴彫闥良媛以羅袂當衝侍臣以藥囊捍患宸慮未

經於細柳天行俄及於穹皇何羅之釁始萌日殫之心

已動公於是攬羲皇之轡駐豐隆之馭闕闕壁而納闕

日闕獸落而留六龍指麾殄寇之兵調停太官之膳羣

兇既成於京觀庶官方及於乘輿公乃率玄甲而清紫

徵奉翠華而入黃道此又耿弇安君父清妖孽也於是
真食井賦紀功旂常文錦玉帶綢繆蕃錫公辭榮畏滿
名遂身退坐樽俎而監淮海衛瓘之忠勤也馳軺車而
款天闕子牟之誠戀也捐寵綬而授松楸楊王孫之達
命也歸鄉里而散金帛蘓季子之行義也慶忌嫉邪之
心萬石周慎之志保貞廉而碎首惡讒慝而忘身思患
覩漏河之初知機見履霜之漸士君子所以推公之明
識也公始罷淮南監軍使詔除內飛龍使荏苒一紀劬

勞六閑朝習華駟暮巡棧皂無竊轡詭銜之患遂翹足
交頸之安瘁精爽於北辰播芳烈於來代旋以股肱近
地河關要津爰輟信臣再監戎旅繡衣晝行於阡陌金
俎暮奠於松楸為子為臣忠孝備矣既而以疾告老乞
還京師累表抗辭留中未下天子眷懷耆舊注意貞良
久而乃從不奪其志此又終始之大節古今之至人長
慶初某忝職內廷獲覩公之儀表玉山峻嶺瓊樹高柯
霍子孟資性端莊進有常處張子孺小心畏忌每遠權

勢御札盈几天香滿衣驂八駿而幸玄洲捧六鈞而殪

青兕勛名光焯當代莫儔夫人岐國夫人王氏寶劍早

沈於清渭珠光先閔於黃泉嗣子瓊林使朝議大夫行

內侍省奚官局令上柱國扶風郡開國公食邑二千戶

襲重封一百五十戶賜紫金魚袋元某夙稟英才早聞

詩禮守公法度以紹家風次子幽州監軍使朝議大夫

行內侍省內僕局令上柱國賜緋魚袋元貢朝議大夫

奚官局令上柱國賜緋魚袋元償儒林郎守內侍省內

府局丞上柱國元真等金貂相映朱紫交輝鳳毛歸美
於一門驥足皆期於萬里以某知公故事見託斯文刻
石路隅庶紀佳績俾後代知天子聞鼓鼙而憶名將鑒
丹青而思老臣乃為銘曰

明堂巍巍天駟前施木帝乘馬是能星馳鳴嚼

闕

車

馬是司趙秦同出後有

闕

馬服生趙

闕

戰國

更霸迭相盛衰趙困長平秦始開基劉累遠孫剪秦無
遺劉即范氏累乃龍師厥泓緜緜尋源乃知貞元年中

公侍丹墀一善及物知無不為進退謬謬行無越思明
明六聖信任不疑赫赫貞臣顛危必持理身清淨成國
雍熙寔本兵柄左右皇威內訓七萃七萃如貌外遏百
蠻百蠻以綏冬有愛日人心所歸疾風勁草輿論欽之
始去禁衛萬夫涕洟逮總天廡六閑允釐盡瘁事國形
神久疲監視諸侯琴書自怡金印組綬去之若遺陶徑
潘園優游在斯長慶六年詔樹豐碑上將刻字文以好
辭後十六年蓋臣其姜原阡松楸兮霜露已滋苑池臺

謝兮榛蕪可悲覩塵根兮空嗟蔓草篆貞珉兮攸媿色
絲

李衛公別集卷六

欽定四庫全書薈要卷一萬四千五十

集部

李衛公別集卷七

唐 李德裕 撰

記

掌書記廳壁記

續漢書百官志稱三公及大將軍皆有記室主上表章
報書記雖列於上宰之庭然本為從軍之職故揚雄稱
軍旅之際飛書馳檄用枚臯非夫天機殊健學源濬發

含思而九流委輸揮毫而萬象駿奔如庖丁提刃為之
滿志師文鼓瑟效不可窮則不能稱是職也昔安豐侯
竇融徵還京師光武問曰所上表章誰與參之融曰皆
從事班彪所為及竇憲貴寵班固傳毅之徒皆置之戎
幕以典文章憲郎文章之盛冠於當代魏氏以陳琳阮
瑤管記室自東漢以後文才高名之士未有不由於是
選其簡才之用亦金馬石渠之亞况河東精甲十萬提
封千里半雜胡騎遙制邊朔惟師旅之威容為列藩之

儀表典茲羽檄代有英髦間者吳少微富嘉模王翰孫
逖咸有制作存於是邦其所不知蓋闕如也暨太尉臨
淮王總節制之師德裕叔父嘗與斯職尋以才識英妙
肅宗召拜監察御史殿後僕射高貞公今河陽節度令
孤公以人文掌宸翰國子司業鄭公給事河南尹杜公
以才華登貴仕繼斯躅者不亦盛歟丙申歲丞相高平
公始自樞衡以膺謀帥以右拾遺杜君為主記明主惜
其忠規復拜舊職尋參內庭視草之列次用殿中侍御

史崔君德裕獲接崔君之後文學空虛才術莫迨繼清
塵於吾祖挹芬烈於前賢先是廡廊之下有豐碑紀其
名氏而不書職業今再刊斯記於本署西垣以高平公
統戎為始元和十四年四月十一日記

丞相鄒平公新置資福院記

夫威鳳之炳然非海晏則不至卿雲之靄然非氣和則
不至故君子藏器抱璞含忠毓德不遭遇其時則光名
不曄是以干木之退也高於千乘君曼容之仕也止於

六百石先僕射佩虎符而知足視蟬冕而蔑如由斯志
矣先僕射苞文武之道有清直之德良玉美潤徒蓄寶
於荆岑喬木幽深不呈材於廊廟知者所以嘆息也丞
相鄒平公鍾是餘慶為唐寶臣公天挺奇表角犀特秀
居五嶽也稟太華削成之狀方四時也得清秋爽朗之
氣森矛戟以耀穎粲珪璋而洞照蓋人之傑歟憲宗皇
帝以神武之姿墾除菑害睿慮澹以泉默英威赫而電
斷奇權秘計皆中詔決之參宸筭者惟公與二三麾士

揣摩潤色繫公稱首既平淮夷盪齊寇四罪咸服八表
晏然雖則武力之拘原亦由謀臣之決策洎今上之宅
憂也袞龍未罷嚮明未位召公於東宮含春殿欹殿前
席付以大柄公乃請偃武論道與天下休息上若涉水
而得舟檝馭馬而有銜轡始拜言以命咎即其時而相
說君臣之遇古無儔也公之為政貞以制動平以稱物
其志在於識相體弘簡易而已嘗以為用京房之法則
煩碎而亂理聽嗇夫之辨則捷給而傷化由是遵坦夷

之路室邪枉之門不勤人以務遠恥竭澤以言利矧夫
洞虛明之境應必以誠端不言之蹊孰不歸我故奉聖
者稱公為良相焉公之趨丹啓侍紫垣名冠近臣寵加
贈典先僕射自弭貂而升左揆先夫人由趙郡而啓大
國金印石帘當代榮之建中初先僕射以柱下史參梓
潼軍計典昌榮二部一部之內有林居一廛庾氏誅茅
始傷於寄寓仲長樹果終見於繁蔚公年纔佩觿志拾
清紫方覃思於經籍未馳騫於文章游焉息焉必在於

是及鍾家難乃入為官暨常太尉鎮是邦也公釋褐從事在賓幄之間逮茲抗戎旌佩相印曾未一紀繼為三公下車逾月訪於舊館召伯之樹未剪武侯之廬猶在于公邑里遂見高車龍驤門閤竟容長戟公瞻構灑泣循陔永思以為徵壞壁者夫子之居尚毀固朽宅者如來之乘斯遠孰若歸於淨土環以香林乃購之於官以為精舍又以桑門之上首者七人居之所以證迷途而資夙植也殿堂層立軒房四柱鎔金作繪髣髴諸天況

乎蜀山葱蒨下臨於雉堞錦江明滅近繚於郊垌紅樹
倚檻青蕖榜砌海鷗乍來靈草長秀彼之聽和音者不
惟於寂慮聞異香者自入於禪薰公之孝思永代作則
豈止何充之宅獨入檀那將與文公之堂俱為不朽某
貌焉孤生流落於代辱公感舊遂不見遺公自內庭升
台司居視草之列二三年間位偕先達由是議人倫者
歸公之盛德不倍密坐驟變寒暑迂懸榻之念忝授簡
之思且嘗典綸綍獲備官寮報德不讓懼斯文之闕焉

長慶二年十月二十二日朝議大夫御史中丞上柱國
贊皇縣開國男食邑三百戶賜紫金魚袋李德裕撰

重寫前益州五長史真記

益州草堂寺

成都記云在府西七里去浣花亭三里

列畫前長史一十四

人節度職不帶尹則帶
長史非今賓佐也

代稱絕筆余嘗於數公子孫之

家獲見圖狀乃知草堂繪事靡不造真者昔巖野旁求
徒聞審像稽山高遜惟止鎔金孰若記之丹青妙盡神
照楚國祠廟魯王宮室洎此邦文翁舊館皆圖歷代卿

相粲然可觀雖有慕於前良曾莫究於形似豈與夫年
代已遠遺像猶存入虛室而烟霞暫披拂浮埃而瑤林
斯覲予以精舍甚古貌像將傾乃選其功德尤盛者五
人模於郡之聽所追維二漢臺閣皆有圖寫黃霸于定
國雖宰相名臣不得在畫像之列卓子康德行君子而
在功臣之右今之所取意在斯乎闕既新光靈可想
儼若神對吾將與歸因叙其事詔諸來招太和四年閏
十二月十八日西川劍南節度副太使知節度事銀青

光祿大夫檢校兵部尚書兼成都尹御史大夫贊皇縣
開國伯李德裕記

懷崧樓記

懷崧思解組也元和庚子歲予獲在內庭同僚九人丞
弼者五數十年間零落將盡今所存者惟三川守李公
而已

已殘者西川杜公武昌元公中書常公鎮
海路公吏部沈公左丞庾公舍人李公

洎太和

已丑歲復接舊老同升台階或纔嘆止輿已協白雞之
夢或未聞稅駕遽有黃犬之悲向之榮華可以悽愴况

予憂傷所侵疲茶多病常驚北叟之福豈忘東山之歸
此地舊隱曲軒傍施僻塊竹樹陰合簷檻晝昏喧雀所
依涼飈罕至予盡去危堦敞為虛樓剪榛木而始見前
山除密篠而近對嘉樹

廳事前有大辛夷樹方為草木所蔽

延清輝於月

觀留愛景於寒榮晨憇宵遊皆有殊致周視原野永懷
崧峯肇此佳名且符夙尚盡庾公不淺之意寫仲宣極
望之心貽於後賢斯乃無愧丙辰歲丙辰月銀青光祿
大夫守滁州刺史李德裕記

玄真子漁歌記

德裕頃在內庭伏覩憲宗皇帝寫真訪求玄真子漁歌
嘆不能致予世與玄真子有舊早聞其名又感明主賞
異愛才見思如此每夢想遺跡今乃獲之如遇良寶於
戲漁父賢而名隱鵝夷智而功高未若玄真隱而名彰
顯而無事不窮不達其嚴光之比歟處二子之間誠有
裕矣長慶三年甲寅歲夏四月辛未日潤州刺史兼御
史大夫李德裕記

祭唐叔文

維元和十二年歲次丁酉六月己未朔二十一日己卯
河東節度使檢校吏部尚書平章事張弘靖敢昭告於
晉唐叔之靈惟神娘母發祥手文為信殪徒林之兕以
啟夏墟受密湏之鼓以疆戎索豈止削桐無戲歸未有
典宜在晉蕃育與周盛衰況式瞻西山神靈是宅每延
烟夜簇嵐氣朝濟必膚寸而合油然以遍蓄泄在我神宜
主之屬淮雨為災霖盛將廢是用率茲祀典以榮閼宮

伏願降福蒸人撤茲陰沴俾三農有望萬庾斯豐永儲
犧牲以答神貺尚饗

予元和中掌記戎幕時因晉祠止雨太保高平公命
予為此文嘗對諸從事稱賞以為徵唐叔故事殆無
遺漏今遇尚書博陵公移鎮北都輒敢寄題廟宇會
昌四年三月十五日司徒兼門下侍郎平章事李德
裕

祭韋相執誼文

維大中四年月日趙郡李德裕謹以疏禮之奠敬祭於
故相常公僕射之靈嗚呼皇道咸寧藉於賢相德邁臯
陶功宣呂尚文學世雄智謀神貺一遘讒疾投身荒瘴
地雖厚兮不察天雖高兮難諒野掇澗蘋晨薦秬鬯信
成禍深業崇身喪某亦竄跡南陬從公舊丘永泯軒裳
之顧長為猿鶴之愁嘻吁絕域寤寐而周倘知公者測
公無罪不知我者謂我何求其心若水其死若休臨風
敬吊願與神遊尚饗

李衛公別集卷七

欽定四庫全書薈要卷一萬四千五十一

集部

李衛公別集卷八

唐 李德裕 撰

箴

丹扆箴并序

臣聞詩云心乎愛矣遐不謂矣此古之賢人所以篤於事君者也夫迹疏而言親者危地遠而意忠者忤然臣竊念拔自先聖偏倚寵光若不爱君以忠則是上負靈

鑒臣頃事先朝屬多陰沴常獻大明賦以諷頗蒙先朝
嘉納臣今日盡節明主亦猶是心昔張敞之守遠郡梅
福之在遐徼尚竭誠盡規不避尤悔況臣嘗學舊史頗
知官箴雖在疏遠猶思獻替謹稽首上丹宸六箴具列
於後仰塵睿覽伏積兢惶

一宵衣箴

先王聽政昧爽以俟雞鳴既盈日出而視伯禹大聖寸
陰為貴光武至仁反友不忌無俾姜后猶去簪珥彤管

記言克念前志

二正服箴

聖人作服法象可觀雖在宴遊尚不懷安汲黯莊色能
正不冠揚阜毅然亦譏縹紵四時所御各有其官非此

勿服惟辟所難

毅然一作慨然

三罷獻箴

漢文罷獻詔還駮駢鑾輅徐驅安用千里厥后令王亦
能恭已翟裘既焚筒布則毀道德為麗慈儉為美不過



天道斯為至理

四納誨箴

惟后納誨以求厥中從善如流乃能成功漢驚沉酒舉
白浮鍾魏叡侈汰凌霄作宮中雖不忤而善亦從以規
為瑱是謂塞聰

五辨邪箴

居上處深在察微萌雖有讒慝不能蔽明漢之孝昭叡
過周成上書知詐照姦得情燕蓋既折王猷治平百代

之後乃流淑聲

六防微箴

天子之孝敬遵王度安必思危乃無遺慮亂臣猖獗非
可遽數玄黃莫辨觸瑟始仆栢谷微行豺豕塞路覩貌
獻殮斯可誠懼

古箴并序

戊辰歲仲春月戊申夜余宿於洞庭西夢與中書令姚
公偶坐如舊相識問余曰君見僕所作口箴乎余對曰

去歲居守東周於公曾孫諫議某處觀金石之刻遂莞
爾而笑曰孫子猶能記之余以仲夏月達於海曲嘗竊
思之聖哲之言上可以動天地成典謨次可以正人倫
明得失默而不言後代何述焉繫辭云不善則千里之
外遠之在植其所言而已矣豈不緘其口銘其背以矯
當世哉揚子稱孰有書不由筆言不由舌張儀以舌存
而交亂亦善不善之效也余感姚公之夢乃為舌箴云
粵有帝舜洎於殷宗龍命惟允說言乃雍周有良弼王

之喉舌鼓舞而生渙汗乃發傳以言旋作義易以講習
施悅天以卷舌屏讒儒以金口駕說伯陽之誠柔存剛
缺言貴無瑕辯貴若訥則知門猶閉囊不在括是以揚
雄悼讒者之冤梅福痛忠臣之結善乎先聖之言既明
且清國以之寧人之不朽犯無隱情無恃爾言駟馬不
及嗟爾君子念茲在茲勿以寤一言而取宰相勿以舌
三寸而為帝師徒見婁敬掉而獲爵不知魏其齧以可
悲雖言必有中而適其時子房能用其策難以爭立愛

奉春善建不拔無以免係縲衛武警夫莫捫叔向哀於是出惟敬仲之難明由匠石之無質揚子曰重則有法輕則招憂言能如是可以寡尤

聖祖院石磬銘

有美浮石淒若銅音笙竽合奏鸞鷟在林清越盈耳和愉感心懸之玉宇永託僊岑

鹿跡山銘

不動者山不死者仙山在仙存真訣不傳猗歟先生耽

道體玄騰駕素鹿遨遊紫烟時憇蓬壺下視桑田一往
茲山于今幾年茲山岑寂先生是宅清泉綠蘿獨與世
隔我居洞宮人見崖壁空留鹿跡永存幽石

劍門銘

羣山西來波積雲屯地險所會斯為蜀門層岑峻壁森
若戈戟萬壑奔東雙飛高闕翠嶺中橫黯然黛色樹茲
雄屏以衛王國

劍門當中有一峰峻嶺橫峙望若列
屏此一峯最奇而說者未嘗及也

峯

拔井幹溪回溝洫嚴守重扃隱如臨敵運有隆替地無

險阨閉於昏頑開於有德馬錯西伐蜀侯敗績艾出陰
平禪亦來格粵在憲祖英威四克始剪蜀妖遂清邛棘
蠻夷軌道諸侯述職武臣銘之金石乃刻

圮上圖贊

夫天所以晬清者其氣理也故能四時變化萬物粲然
倭則陰陽為灾光景不耀而況於人乎人亦肖圜方之
形稟清濁之氣存神索智極物窮情則倚伏之先見其
如視矣子房潛心於神而達之見其圓狀如得其奧則

有女子之粹美嬰兒之專和粹所以含至精專所以研至蹟散萬金之資柔毅也報萬乘之仇仁勇也學禮

闕

履方也變名圮上避世也若乃五日為期三往增敬則尾生之信違道矣退不離國心不忘君則鴟夷之道非忠矣合時變以蟬蛻望僊路以鴻冥優游於綺皓之門髣髴乎赤松之際豈不善始善終哉黃石者其天地之蘊神明之璽歟不然則無以覺悟子房輔翼天漢嗟乎喪亂既定韜匱而葆祠之生也奉符歿而同穴有以

見子房之神交不渝矣

大迦葉贊

頭陀
第一

惟大迦葉依無上智初分寶座終授密記晚遇金粟乃
知平地潜形雞足以待慈氏

李衛公別集卷八

欽定四庫全書薈要卷一萬四千五十二

集部

李衛公別集卷九

唐 李德裕 撰

記

平泉山居戒子孫記

經始平泉追先志也吾隨侍先太師忠公在外十四年
上會稽探禹穴歷楚澤登巫山遊沅湘望衡嶠先公每
維舟清眺意有所感必淒然遐想屬目伊川嘗賦詩曰

龍門南岳盡伊原草樹人烟目所存正是北州黎棗熟
夢魂秋日到郊園吾心感是詩有退居伊洛之志前守
金陵於龍門之西得喬處士天寶末避地遠遊為荒榛
首翠微山尚有薇蕨山陽舊徑唯餘竹木吾乃剪荆莽
驅狐狸始立班生之宅漸成應叟之地又得名花珍木
奇石列於庭際平生素懷於此足矣吾嘗以出處者貴
得其道進退者貴不失時古來賢達多有遺恨至於玄
祖潛身在柱史柳惠養德於士師漢代丙曷容官不過

六百石終無辱殆邈難及矣越蠡激文牛以肥遁留侯
託黃老以辭世亦其次焉范曄感蔡澤一言超然高謝
鄧禹見功臣多敗委遠名勢又其次也矧吾者於葵無
衛足之智處有不鳴之患雖有泉石杳無歸期留此林
居貽厥後代鬻平泉者非吾子孫也以平泉一樹一石
與人者非佳也吾百年後為權勢所奪則以先人所命
泣而告之此吾志也詩曰維桑與梓必恭敬止言其父
所植也昔周人之思召伯愛其所憩之樹近代薛令君

於禁省中見先祖所據之石必泣然流涕汝曹可不慕之惟岸為谷谷為陵然後已焉可也

平泉山居草木記

余嘗覽想石泉公家藏藏書目有園庭草木疏則知先哲所尚必有意焉余二十年間三守吳門一涖淮服嘉樹芳草性之所耽或致自同人或得於樵客始則盈尺今已豐尋因感學詩者多識草木之名為騷者必盡蓀荃之美乃記所出山澤庶資博聞木之奇者有天台之

金松琪樹稽山之海棠榷檜剡溪之紅桂厚朴海嶠之
香檉木蘭天目之青神鳳集鍾山之月桂青飈楊梅曲
房之山桂溫樹金陵之珠柏欒荆杜鵑笄山之山桃側
柏南燭宜春之柳柏紅豆山櫻藍田之栗梨龍柏其水
物之美者荷有蘋洲之重臺蓮芙蓉湖之白蓮茅山東
溪之芳蓀復有日觀震澤巫嶺羅浮桂水嚴湍廬阜瀟
澤之石在焉其伊洛名園所有今並不載豈若潘賦閒
居稱郁棣之藻麗陶歸衡宇喜松菊之猶存爰列嘉名

書之於石已未歲又得番禺之山茶宛陵之紫丁香會稽之百葉木芙蓉百葉薔薇永嘉之紫桂簇蝶天台之海石楠桂林之俱邠衛台嶺八公之怪石巫峽之嚴湍琅邪臺之水石布於清渠之側仙人跡鹿跡之石列於佛榻之前是歲又得鍾陵之同心木芙蓉剡中之真紅桂稽山之四時杜鵑相思紫苑貞桐山茗重臺薔薇黃槿東陽之牡桂紫石楠九華山藥樹天蓼青樨黃心栳子朱杉龍骨庚申歲復得宜春之筆樹楠稚子金荊紅

筆密蒙勾栗木其草藥又得山薑碧百合

劇談錄李德裕東都平泉莊去洛城三十里卉木臺榭若造仙府有虛檻對引泉水縈回疏鑿像巫峽洞庭十二峰九派迄於海門江山景物之狀以間行逕有平石以手磨之皆隱隱見雲霞龍鳳草樹之形初德裕營平泉遠方之人多以異物奉之有題平泉詩曰隴右諸侯供語鳥日南太守送名花

賈氏談錄贊皇公平泉莊周圍十里構臺榭百餘所

今基址猶存天下奇花異草珍松怪石靡不畢致其

間故德裕自製平泉草木記今悉蕪絕惟雁翅檜珠

子柏蓮房玉藻等蓋僅有存焉

雁翅檜葉婆娑如鴻雁之翅珠子柏相實

皆如白珠子藤生葉上香聞數十步蓮藥跗萼上花分五朵而實同一房

怪石名品甚衆

多為洛城有力者取去

石上皆刻女道二字

惟禮星石及師子

石今為陶學士徙置梨園別墅

禮星石縱廣一丈厚尺餘有文理成斗極

之象師子石高三四尺孔竅千萬通相通貫其狀如師子首尾眼鼻皆具足

河南志河南長殿南有婆娑亭貯奇石處世傳李德

裕醒酒石以水沃之有林木自然之狀今謂婆娑石
蓋以樹名

五代史張全義字國維監軍嘗得李德裕平泉醒酒
石德裕孫延古因託全義復求之監軍忿然曰自黃
巢亂後洛陽園池無復能守豈獨平泉一石哉全義
嘗在巢賊中以為譏已因大怒奏答殺監軍者

金松賦并序

廣陵東南有顏太師猶子舊宅其地即孔北海故臺子

因晚春夕景命駕遊眺忽覩竒木植於庭際枝似檉松
葉如瞿麥迫而察之翠葉金貫粲然有光訪其名曰金
松訊其所來曰得於台嶺乃就主人求得一本列於平
泉今聞封植得地枝葉茂盛叙其所自作此賦

青春已暮白日將夕經顏子之故巷訪孔公之舊宅美
珍木之在庭得嘉名於樵客曩擢本於台嶺近徙根於
簷隙其柯肅肅可比於真松其葉纖纖寔侔於瞿麥風
入葉而成韻露垂柯而流液不受命於嚴霜諒同心於

寒柏含春靄而蔥蒨映夕陽而的礫疑翠尾之羣翔若
金潭之旁射襍爽籟於簧竹混晶光於瑤碧竒樹以垂
珠而擅名金松以潛穎而莫覲亦猶處子在於隱淪竒
才遺於草澤我有衡宇依山岑寂類仲長之清曠如蕭
宰之窮僻託根此地似在崖壁殊橘柚之不遷同甘棠
之可惜庶封植於園林永愛玩而無斁

靈泉賦并序

予林居西嶺平壤出泉廣不逾尋而深則盈尺自東鄰

故丞相崔公至谷口故丞相司徒李公凡別墅五六皆
謂之平泉寔發源於此觀其湧不騰沸淡然冽清冬溫
夏寒明媚可鑒其靈泉之蘊也予往歲獲戾放逐再羅
謗傷泉必變色久而後復昔傅長虞庭有湧泉以其色
在夏則冷涉冬而溫乃為神泉賦况潛靈蘊異美過神
泉因效長虞所作偶成此賦

效一作擬

山下出泉厥壤非石隨淺深而見底實秋毫之可析其
瑩若纖埃之映琉璃微虫之潛琥珀玉瑕瑜而不掩鏡

妍媸而盡覲且夫動則廣大止則虛明如君子之絕德

乃望表而見情發源而東百谷皆盈既處高而就下雖

遇坎而亦平曩者方騁康衢俄驚覆轍泉色暫晦含晶

不發又如塵掩懸蔡霧昏秋月累夕而翳盈旬乃澈爾

其脉引清泚環匝荆扉淪漣寫照物色殊暉孕蘋藻為

瑤碧涵沙磔為珠璣歷長坂而鱗爛度小山而雪披若

乃砥石於宇析波自開入虛白而逶迤浮縹清而繚繞

氣潤蘭蘅色滋松篠含逸響於桐林動孤光於溪鳥於

是列植芳菊華艷芊綿漬漪瀾而更馥搖霽景而相鮮
葉凝夕露叢靄秋烟美楚人之飡英慕胡公之飲泉况
復自亭徂溪黃緣數里懸瀑溜於碧潭散浮湍於清沚
乘鷁舳以晨泛聽菱歌而夜起見蒹葭之始香疑湘沅
之在此重曰原隰既平泉流既清三逕未荒萬木向榮
感棣華之零落愴時鳥之相鳴恐閱水兮日逝且歸來
兮養生

秋聲賦并序

昔潘岳寓直騎省因感二毛遂作秋興賦况予百齡過

半承明三入髮已皓白

自中書舍人及
牛三參掖垣

清秋可悲尚書

十一丈鵷掖上寮人文大匠聊為此作以俟知音

露華肅天氣晶碧空無氛霽海清明當其時也草木陰

蟲皆有秋聲自虛無而響作由寂寞而音生始蕭瑟於

林野終混合於太清出哀壑而憤起臨悲谷而怨盈朔

雁聽而增逝孤猿聞而自驚此聲也異桐竹之韵非金

石之鳴足以動羈人之魄感君子之情況乎臨淄藻思

薛縣英名遽興華屋之嘆預想曲池之平豈待琴而魂
散固聞笛以涕零亦有毀家蔡琰降北李卿聽朔吹之
夜動見霜鴻之曉征既慷慨而許獨汎瀾而流纓雖
復蘓門傲世秦青送行詎能寫自然之天籟究吹萬之
清泠客有貞詞瀏澆逸氣縱橫賦掩漏卮之妙文同蟠
木之精聊染翰以寫意期報之以瑤瓊

牡丹賦并序

予觀前賢之賦草木者多矣靡不言託植之幽深採斲

之莫致風景之妍麗追賞之歡愉至於體物良有未盡
惟牡丹未有賦者聊以狀之僕射十一丈蔚為儒宗詞
賦之首聲氣所感或能相和又見陳思王賦序多言命
王粲劉楨繼作今亦效之邀侍御裴舍人同作

青陽既暮鷦鷯已鳴念蘭若之方歇嘆桃李之陰成惟
翠華之艷燭傾百卉之光英抽翠柯以布素粲紅芳而
發榮其始也碧海霄澄驪珠躍出深波曉霽丹梓吐寶
煥神龍之銜燭皎若木之並日其盛也若紫芝連葉鵲

雛比翼奪珠樹之鮮輝掩非烟之奇色倏忽摘錦紛葩
似織其落也明艷未禡紅衣如脫朱草柯折珊瑚枝碎
霞既皦而轉妍紅欲消而猶絳爾乃獨含芳意幽怨殘
春將獨立而傾國雖不言兮似人觀其露彩猶泣日華
初照熒其晨葩情欲微笑色雖美而自艷類河汾之窈
窕逮乎的皦含景離披向風鉛華春而思蕩蘭澤晚而
光融情放縱以自得處若煥之冶容既而華艷恍惚繁
華遽畢驚寶雉之乍迴想江妃而復出望獻璫之玉俄

以蔽光感懷珮之川悵然如失客顧余曰勿謂淑美難
久徂芳不留彼妍華之閱世非人壽之可倚君不見龍
驤開宏池臺御溝堂挹山林峰連翠樓有百歲之芳叢
今京師精舍甲第猶
有天寶中牡丹在
無昔日之通侯豈暇當飛藿之時
始嗟零落且欲同樹萱之意聊自忘憂

近於伊川卜山居將命者畫圖而至欣然有感聊
賦此詩兼寄上浙東元相公大夫使求青田

胎化鶴

乙巳
歲作

弱歲弄詞翰遂叨明主恩懷章過越卽建旆守吳門西
圯陰難駐東臯意尚存慚逾六百石愧負五千言寄世
知嬰繳辭榮類觸藩欲追綿上隱况近子平村邑有桐
鄉愛山餘黍谷暄免非逃相地乃是故侯園野竹多微
逕岩泉豈一源映池方樹密傍澗古藤繁叩杖堪扶老
闕牛已服轅只應將唳鶴幽谷共翩翻

憶平泉山居贈沈吏部一首

中書作

昔聞羊叔子茅屋在東渠豈不念歸路徘徊畏簡書乃

知軒冕客自與田園踈歿世有遺恨精誠有所如嗟余
寡時用夙志在林間雖挹山水癖敢希仁智居清泉繞
舍下修竹蔭庭除幽徑松蓋密小池蓮葉初從來有好
鳥近復躍鯨魚少室映川陸鳴皋對蓬廬張何舊寮案
予與吏部乃相勉在懸輿常恐似伯玉瞻前慚魏舒

金門寮故也

夏晚有懷平泉山居

宜春作

孟夏守畏途捨舟在徂暑愀然何所念念我龍門塢密
竹無蹊徑高松有四五飛泉鳴樹間颯颯如度雨菡桂

秀層嶺芳蓀媚幽渚稚子候我歸衡門獨延佇誰言聖
與哲曾是不懷土公旦既思周仲尼亦念魯矧余竄炎
裔日夕誰晤語眷闕悲子牟班荆感椒舉悽悽視環玦
惻惻步庭廡豈待莊舄吟方知倦羈旅

早秋龍興寺江亭閒眺憶龍門山居寄崔張舊

從事 宜春作

江亭感秋至蘭徑悲露泣杭稻秀晚川杉松鬱晴嶺嗟
予有林壑茲夕念原衍綠篠連嶺多青莎近溪淺淵明

菊猶在仲蔚蒿莫剪喬木架凌苔陰崖積幽蘚遙思伊
川水北渡龍門峴蒼翠雙闕間逶迤清灘轉故人在鄉
國歲晏路悠緬惆悵此生涯無由共登踐

比聞龍門敬善寺有紅桂樹獨秀伊川嘗於山
南諸山訪之莫致陳侍御知余所好因訪剡
溪樵客偶得數株移植郊園衆芳色沮乃知
敬善所有是蜀道茵草徒得嘉名因賦是詩

兼贈陳侍御

金陵作

昔聞紅桂枝獨秀龍門側越叟遺數株周人未嘗識平生愛此樹攀翫無由得君子知我心因之為羽翼豈煩嘉客譽且就清陰息來自天姥岑長疑翠嵐色芬芳世所絕偃蹇枝漸直瓊葉潤不凋珠英粲如織猶疑翡翠宿想待鵝鷄食寧止暫淹留終當更封植

懷山居邀松陽子同作

我有愛山心如飢復如渴出谷一年餘常疑十年別春思巖花爛夏憶寒泉冽秋憶泛蘭卮冬思翫松雪晨思

小山桂暝憶深潭月醉憶剖紅梨飯思食紫鰕坐思藤
蘿密步憶莓苔滑晝夜百刺中愁腸幾回絕每念羊叔
子言之豈常輟人生如意事十乃居七八我未及懸輿
今猶佩朝紱馬能逐麋鹿便得遊林樾范恣滄波舟張
惟赤松列惟應詎身恤豈敢忘臣節器滿自當敲物盈
終有缺從茲返樵徑庶可希前哲

思歸赤松村呈松陽子

昔人思避世惟恐不深幽禽慶潛名岳鵬夷漾釣舟顧

余知止足所樂在歸休不似尋山者忘家恣遠遊

近臘對雪有懷林居

蓬門常晝掩竹逕寂無人鳥起飄松霰麇行動谷榛應

闕

禽魚侶

闕

與薜蘿親遙憶平臯望溪烟已發春

李衛公別集卷九

欽定四庫全書薈要卷一萬四千五十三

集部

李衛公別集卷十

唐 李德裕 撰

思山居十首

清明後憶山中

遙思寒食後野老林下醉月照一山明風吹百花氣飛
泉與萬籟鬚疑簫吹不待曙華分已應喧鳥至

題寄商山石

綺皓巖中石常經

開

隱淪紫芝

開

幾曲紅蘚悶千春聊

用支琴尾寧惟倚病身自知來處所何暇問嚴遵

憶種菰時

尚平方畢娶疏廣念歸期澗底松成蓋簷前桂長枝
逕閒芳草合山靜落花遲雖有菰園在無因及種時

春日獨坐思歸

壯齡心已盡孤賞意猶存豈望圖麟閣惟思卧鹿門
無謀堪適野何力可拘原只有客身去幽山自灌園

思登家山林嶺

自知無世用只是愛山遊
舊有嵇康嬾今慚趙武偷
登巖未覺疾汎水便忘憂
最惜殘筋力捫蘿遍一丘

思鄉園老人

常羨華門翁所思惟歲稔
遙知松月曙尚在山窗寢
蘭氣入幽簾禽言傍孤枕
晨興步巖迳更酌寒泉飲

寄龍門僧

龍門有開士愛我春潭碧
清景出東山間來翫松石
應

憐林壑主遠作滄溟客為我謝此僧終當理歸策

憶藥苗

溪上一苗齊手茸正堪掇皆能扶我壽豈止堅肌骨味

掩商山芝英逾首陽薇豈如甘谷士只得香泉啜

南陽甘谷

有菊水是
湖廣出者

憶村中老人春酒

有劉楊二
叟善釀

二叟茅茨下清晨酌濁醪雨殘紅芍藥風落紫櫻桃巢

燕銜泥疾簷虫掛網高閒思春谷事轉覺宦途勞

憶葛勝木禪床

憶我齋中榻寒宵幾獨眠
管寧穿亦坐徐孺去常懸
虫網垂應遍苔痕染更鮮
何人及身在歸對老僧禪

初夏有懷山居

山中有所憶夏景始清幽
野竹陰無日巖泉冷似秋
翠岑當累榭皓月入輕舟
只有思歸夕空簾且夢游

張公超谷中石

鼓篋依綠槐橫經起秋霧
有時連岳客尚辨弦歌處
自

予去幽谷誰人襲芳杜空留古苔石對我岩中樹

初歸平泉過龍門南嶺遙望山居即事

初歸故鄉陌極望且徐輪近野樵蒸至平泉烟火新農
夫饋雞黍漁子薦霜鱗惆悵懷楊僕慚為闕外人

伊川晚眺

桑葉初黃梨葉紅伊川落日盡無風漢儲何假終南客
用里先生在谷中

潭上喜見新月

簪組十年夢園廬
今夕情誰憐故鄉月
復映碧潭生皓彩
松上見寒光波際輕
還將孤賞意暫寄玉琴聲

郊外即事奉寄侍郎大尹

高秩慚非隱間林喜退居
老農爭席坐稚子帶經鋤
竹逕難迴騎僊舟但跋予
豈知陶靖節祇自愛吾廬

山居遇雪喜道者相訪

幽居近谷西喬木與山齊
野竹連池合巖松映雪低
喜君來白社值我在青谿
應笑於陵子遺榮自灌畦

雪霽晨起

雪覆寒溪竹風卷野田蓬四望無行跡誰憐孤老翁

洛中士君子多以平泉見呼愧獲方外之名因
以此詩為報奉寄劉賓客

非高柳下逸自愛竹林間才異居東里愚因在北山徑
荒寒未掃門設晝長闕不及鷓鴣子悠悠烟水間

早春至言禪公法堂憶平泉別業

金陵作

昔我伊原上孤遊竹樹間人依紅桂靜鳥傍碧潭閒松

蓋低春雪藤輪倚暮山永懷桑梓邑衰老若為還

峽山亭月夜獨宿對櫻桃花有懷伊川別墅

金陵

作

皎月照芳樹鮮葩含素輝
愁人惜春夜達曙想巖扉
風靜陰滿砌露濃香入衣
恨無金谷妓為我奏思歸

春暮思平泉禰詠二十首

自此並淮南作

望伊川

遠村寒食後細雨度川來芳草連谿合梨花映墅開
離懸落照松逕長新苔向夕亭臯望遊禽幾處回

潭上紫藤

故鄉春欲盡一歲芳難再巖樹已青葱吾廬日堪愛
幽溪人未去芳草行應礙遙憶紫藤垂繁英照潭黛

書樓晴望

幽居人世外久厭市朝喧蒼翠連雙闕微茫認九原

東望

盡見萬安山
南名臣丘壠

殘紅映翠樹斜日照轆轤薄暮柴扉掩誰

知仲蔚園

西嶺望鳴皋山

高秋對涼野四望何蕭瑟遠見鳴皋山青峰原上出晨
興採薇蕨向暮歸蓬華詎假數揮金飡和養餘日

瀑泉亭

向老多悲恨淒然念一丘巖泉終古在風月幾年遊
閤饒佳樹菱潭有釣舟不如羊叔子名與峴山留

紅桂樹

此樹白花紅
心因以為號

欲求塵外物此樹是瑤林後素合餘絢如丹見本心妍
姿無點辱芳意託幽深願以鮮葩色凌霜照碧潯

金松

出天台山

台嶺生奇樹佳名世未知纖纖疑大菊落落是松枝照
日含金晰籠烟淡翠滋勿言人去晚猶有歲寒期

月桂

出蔣山
淺黃色

何年霜夜月桂子落寒山翠幹生巖中金英在人間幽
崖空自老清漢未知還惟有涼秋夜嫦娥來暫攀

山桂

此花紫色
英藻繁縟

吾愛山中樹繁英滿目鮮
臨風飄碎錦映日亂非烟
影入春潭底香凝月榭前
豈知幽獨客賴此當朱絃

柏

別樹經霜暫紅此柏
枝葉盡丹四時一色

聞有三株樹惟應秘閨風
珊瑚不生葉朱草又無叢
未若凌雲柏常能終歲紅
晨霞與落日相照在巖中

蓀

生茅山東溪陶隱居
謂之溪蓀花紫色

楚客重蘭蓀遺芳今未歇
葉抽清淺水花照暄妍
節紫

艷映渠鮮輕香含露結離君若有贈暫與幽人折

流盃亭

激水自山椒折波分淺瀨回環疑古篆詰曲如縈帶雪
翹羽觴遲惟觀親友會欲知中聖處皓月臨松蓋

東谿

近蓄東谿水悠悠起淥波綵鷺留不去芳草日應多夾
岸生竒篠綠巖覆女蘿蘭橈思無限為感濯纓歌

鷓鴣

清江雙鷺鸕前年海上鷗今來戀洲嶼思若在江湖欲
起搖荷蓋閑飛濺水珠不能常泛泛惟作逐波鳧

西園

西園最多趣永日自忘歸石瀨流清淺峰岑澹翠微曉
翻紅藥艷晴鳥碧潭輝獨望娟娟月宵分未掩扉

海

昔見歷陽山雞籠已孤秀今看海嶠樹翠蓋何幽茂霰

雪詎能侵

此樹枝葉密
霜雪不侵

烟嵐自相揉攀條獨臨憇況值

清陰晝

雙碧潭

清剡與嚴湍潺湲皆可憶
適來玩山水無此秋潭色
莫辨幽蘭叢難分翠禽翼
遲遲洲渚步臨眺忘殫食

竹逕

野竹自成逕繞溪三里餘
檀欒被層阜蕭瑟陰清渠
日落見林靜風行知谷虛
田家故人少誰肯共焚魚

花藥欄

花藥四時相續
常可留翫

蕙草春已碧蘭花秋更紅四時發英艷三逕滿芳叢秀
色濯清露鮮輝搖惠風王孫未知返幽賞竟誰同

自叙

非尚子遍
游五嶽

五嶽逕雖深遍游心已蕩苟能知止足所過皆清曠七
十難可期一丘乃微尚遙懷少室山常恐非吾望

首夏清景想望山居

嘉樹陰初合山中賞更新禽言未知夏蘭逕尚餘春散
滿蘿垂帶扶疎桂長輪丹青寫不盡宵夢嘆非真累榭

空留月虛舟若待人何時倚蘭棹相與掇汀蘋

思平泉樹石雜詠十一首

釣臺

我有嚴湍思懷人訪故臺客星依釣隱仙石逐槎回倒
影含清泚凝陰長碧苔飛泉信可挹幽客未歸來

似鹿石

林中有奇石髣髴獸潛行乍似依巖桂還疑食野草茸
長綠蘚映班細紫苔生不是見羈者何勞如頓纓

海上石笋

常爱僊都山奇峰千仞懸迢迢一何迥不與衆山連忽
逢海嶠石稍慰平生憶何以侑我心亭亭孤且直

疊

潺湲桂水湍漱石多奇狀鱗次冠烟霞蟬聯疊波浪今
來碧梧下迥出秋潭上歲晚苔蘚滋懷賢益惆悵

重臺芙蓉

芙蓉含露時秀色波中溢五女襲朱裳重重映皓質晨

霞耀丹景片片明秋日蘭澤多衆芳妍姿不相匹

白鷺鷥

余心憐白鷺潭上日相依拂石還星落凌風似雪飛碧
沙常獨立清景自忘歸所樂惟烟水徘徊戀釣磯

海魚骨

昔日任公子期年釣此魚無由見成岳聊喜識專車皎
皎連霜月高高映碧渠陶潛雖好事觀海只披圖

泛池舟

桂舟蘭作柁芬芳皆絕世只可弄潺湲馬能濟大川樹
懸涼夜月風散碧潭烟未得同漁子菱歌共扣舷

舴艋舟

無輕舴艋舟始自鴟夷子雙闕挂朝衣五湖極烟水時
遊杏壇下乍入湘川裏永日歌濯纓超然謝塵滓

二猿

釣瀨水連漪富春山合沓松上夜猿鳴谷中清響合衝
網忽見羈故山從此辭無由碧潭飲爭接綠蘿枝

思在山居日偶成此詠邀松陽子同作

閒思昔歲事忽忽念伊川
乘月步秋坂滿山聞石泉
回塘碧潭映高樹綠蘿懸
露下叫田鶴風來嘶晚蟬
懷茲長在夢歸去且無緣
幽谷人未至蘭苔應更鮮

乘月一作乘興

重憶山居六首

平泉源

出谷纔浮芥中園已濫觴
逶迤過竹塢浩淼走蘭塘
夜靜聞魚躍風微見雁翔
從茲東向海可泛濟川航

泰山石

兗州從事所寄

雞鳴日觀望遠與扶桑對
滄海似鎔金衆山如點黛
遙知碧峰首獨立烟嵐內
此石依五松蒼蒼幾千載

巫山石

十二峰前月三聲猿夜愁
此中多怪石日夕漱寒流
必是歸星渚先求歷斗牛
揚州是斗牛分還疑烟雨霽
髣髴是嵩丘

丘

羅浮山

番禺連帥所遺

龍伯釣鼇時蓬萊一峰坼

裴淵廣州記羅浮山是蓬萊遶山浮來

飛來碧

海畔遂與三山隔其下多長溪

茅君內傳山下有七十二長溪

潺湲宗

亂石知君分如此贈逾荆山璧

漏潭石

魯客見遺

常疑六合外未信漆園書及此聞溪漏方欣驗尾問大哉天地氣呼吸有盈虛美石勞相贈瓊瑰自不如

釣石

於谿人處求得

嚴光隱富春山色谿文碧所釣不在魚揮綸以自適余

懷慕君子且欲坐潭石持此返伊川悠然慰哀夕

懷伊川郊居

哀疾常懷土郊園欲掩扉雖知明目地不及有身歸
樹秋陰遍伊原霽色微此生看白首良願已應違

晨起見雪隱山居

忽憶巖中雪誰人拂薜蘿竹梢低未舉松蓋偃應多
山溜隨冰落林麋帶霰過不勞聞鶴語方奏苦寒歌

憶平泉雜詩

憶初暖

今日初春暖山中事若何雪開喧鳥至澌散躍魚多幽
翠生松柏輕烟起薜蘿柴扉常晝掩惟有野人過

憶辛夷

余赴金陵
欲問辛夷

昔年將出谷幾日對辛夷倚樹憐芳意攀條惜歲滋清
陰須暫憩秀色正堪思只待揮金日慙慙泛羽卮

憶寒梅

寒塘數樹梅常近牕前開雪映緣巖竹香侵汎水苔遙

思清景暮還有野禽來誰是攀枝客茲辰醉始迴

憶藥欄

野人清旦起掃雪見蘭芽始畎春泉入惟愁暮景斜未
抽萱草葉纔發款冬花誰念江潭老中宵旅夢賒

憶茗芽

谷中春日暖漸憶掇茶英欲及清明火能銷醉客醒松
花飄鼎泛蘭氣入甌輕飲罷閒無事捫蘿谿上行

憶野花

余未嘗春
到故園

雖遊洛陽道未識故園花
曉憶東谿雪晴思冠嶺霞
谷深蘭色秀村迥柳陰斜
悵望龍門晚誰知小隱家

憶春雨

春鳩鳴野樹細雨入池塘
潭上花微落谿邊草更長
疏風白鷺起拂水綵鷺翔
最美歸飛燕年年在故鄉

憶晚眺

伊川新雨霽原上見春山
縱嶺晴虹斷龍門宿鳥還
牛羊平野外桑柘夕烟間
不及鄉園叟悠悠盡日間

憶新藤

遙聞碧潭上春晚紫藤開水似晨霞照林疑綵鳳來清
香凝島嶼繁艷映莓苔金谷如相並應將錦帳迴

憶春耕

郊外杏花坼林間布穀鳴原田春雨後谿水夕流平野
老荷蓑至和風吹草輕無因共沮溺相與事巖耕

余所居平泉村舍近蒙常侍大尹特改嘉名

因寄詩以謝

未謝留侯疾常懷仲蔚園
閒謠紫芝曲歸夢赤松村
忽改蓬蒿色俄吹黍谷喧
多慚孔北海傳教及衡門

山信至說平泉別墅草木滋
長地轉幽深悵然思歸復此作

忽聞樵客語暫慰野人心
幽逕芳蘭密閒庭秀木深
麋鹿來澗底鳬鵲遍川潯
誰念滄溟上歸歟起嘆音

臨海太守惠予赤城石報以是詩

聞君採竒石剪斷赤城霞
潭上倒虹影波中搖日華

闕

接絳氣谿路襟桃花若值客星去便應隨海槎

李衛公別集卷十

謹案卷六第八頁前二行權雖侔於衛霍刊本衛
訛魏據漢書改

卷七第五頁後六行乃知草堂繪事刊本繪訛績
今改


卷九第十三頁前五行惟應詎身恤按此句疑訛
卷十第七頁前一行英藻繁縟刊本脫縟字據全
唐詩改

第七頁前七行陶隱居謂之溪蓀花刊本脫隱居

金
史
四
庫
全
書
卷
之
一
謂之四字據全唐詩增

第十五頁前六行野老荷蓑至刊本荷訛和據全

唐詩改



總校官庶吉士臣張能照

校對官檢討臣蕭九成

謄錄舉人臣李 翹